

# Jekamba maifu Pol yanga Tesalonaikak lindanjik or kayeri

---

**1** <sup>1</sup> An Pol, Sailas fre Timoti nga ni lihi, jekamba kason jir sios yanga Tesalonaikak lindanjik amu kayenduwa. Jir Avui Wasilaka nga Wasilaka nihi Jisas Kraiss nga tiyanda ma jirnjik amu kayenduwa. Jirnjik Avui Wasilakan a sawenak waprushi orhi nga waphimbiji orhi nga or halashinak jihik si naka.<sup>a</sup>

## **Tesalonaikak linda ma Jisasin li hishindiyananda nombo lihi kwambuk si nashirik Pol le li rupshiri**

<sup>2</sup> Avui Wasilakan ji hishindiyananda nombon ni hishihi, ermba ermbak orin armesarmek ni mbanda nir. <sup>3</sup> Uhu os orin ni sawewa wolo, jirin ni hishihi jirnjik er nga orin ni sawenda nir. Os Jisasin ji hishindiyananda nombo oso si uwak mbele mbele jivi nom unda jir. Uhu ma anandin wapnuku jihik ji owenda nombo oso si uwak lerawu havakavan ji laha lirin jelyanda jir. Uhu Wasilaka nihi Jisas Kraiss os or takwan ji hishiowehe ji nikishinda osik, kwambuk ji sitambanaha nomorawun kishanda jir. Erem ji undan ni hishihi Avui Wasilakan armesarmek ni mbanda nira.<sup>b</sup>

<sup>4</sup> Jisasin nakrem ni hishindiyananda ma jirin, Avui Wasilaka jirin wapnuku orhik owenda ri. Uhu orhi mak ji nakmbaha jirin or kamahanda angop ni heyenda sir. <sup>5</sup> Mashi jivi Jisas Kraishi jihik ni laha iri oso mbeek mashimbakop ni saweri ambu nir, wahau. Kwambu Masikome Avui Wasilakahi nga ni ihi kormbak ni sawerik, Masikome or urik, armek ji heyehe mashi Jisashin jimisindiyara. Uhu nombo os mashi Avui Wasilakahin ni misihi, kwambuk ni sitambanaha, ni saweri angop ji heyeri sir. Uhu os jir nga nakrem ni liri wolo, nombo nombo os ni unak ji heyehe ji tiyakmbaha ni uri angop ji heyeri sir.<sup>c</sup>

---

<sup>a</sup> 1:1 Ap 17:1-9   <sup>b</sup> 1:3 1 Ko 13:13; Kl 1:4-6   <sup>c</sup> 1:5 1 Ko 2:4-5

<sup>6</sup>Avui Wasilakahi mashin ji misihi ji tiyanda nombo orok ma ol mashi orhin tiyanda ambu ondo jirin li kavak nakmba li urik nomorawu osmu jihik talara. Hako Masikome Avui Wasilakahi jihik or nashiwak nomorawu oson ji kishandan jimurupkapshinduwa. Jir os nir nga Wasilaka Jisas nga nomorawun mayam ni kishanda hom os jimukishanduwa.<sup>d</sup> <sup>7</sup>Os erem ji uwa nombo nombon Jisasin hishindiyanma ol provins Masedonia nga Akaiak linda nga angop li misihi os jir tiyanda hom olmu tiyanduwa. <sup>8</sup>Mashi Wasilakahi os ji sawenda nga nombo os Avui Wasilakan kwambuk ji hishindiyanma nga hulaima nokopma li misihi haisau handasawe iri mbeek Masedonia nga Akaiakop nga nari ambu sir, wahau. Angop yoko yoko amber hom li mistakori sir. Erem si nashindak nir mbeek Avui Wasilakan ji hishindiyanma nombo oson lirin ni sawekwa ambu nir. <sup>9</sup>Lir angop li heyeri sir, os jihik ni iri wolo, ji rupshihi nirin aka jihik ji laha ihi, mashi nihin ji misirin. Uhu ma tavak li undari godin ji halaha, Avui Wasilaka indinga ermbak er lindan ji hishiowehe, orhi siyok ji sinda nombo oso nga angop li heyehe yanga yangak limu haisau handasawe induwa. <sup>10</sup>Uhu Jikisi Avui Wasilakahi hevenin or halaha indik or takwan ji nikishinda nombo oso er nga limu haisau handasawe induwa. Or angop jirin or jvinashihinda osik, waplelena Avui Wasilakahi mbeek jihik nakwa ambu sir, avak jip likwa jir, karem ji hishihi jimunikishinduwa. Jikisi or harik Avui Wasilaka indik or mbarik usahari oto Jisas oria.

### Pol lerawu os Tesalonaikak or lahandarin or saweri

**2** <sup>1</sup>Jisasin nakrem ni hishindiyanma ma jirin, lerawu os jihi nindik ni lari angop ji heyeri sir, mbeek lerawu semben ni lari ambu nir. <sup>2</sup>Mas yanga Filipaik ni liri wolo, orok fehe nirin hukwamaintlen li mbaha nirin li wormblashihi kavakava indingan nirin uri lir. Hako Avui Wasilaka sunguwavu nihin or mbornashirik kwambuk ni sihi, mashi orhin nimu sawera. Undari hom erema. Os yanga jihi Tesalonaikak ni tari wolo, jihi ma lal nirin kavak nari lir. Hako Avui Wasilaka or jelyashirik kwambuk ni sihi mashi orhin jirin nimu sawera.<sup>e</sup> <sup>3</sup>Nir mbeek mainmbango mashi las jirin ni saweshinak, nombo kavan ji tiyakmbaha ni saweri ambu nir. Uhu nir mbeek mbele mbele kavan ji ukmbaha ni saweri ambu nir, wahau. Uhu hi nihin ji hauowekmbaha, Avui Wasilakahi mashin ni saweri ambu nir, wahau. Uhu mashi las wavu nihik ni hishihi jirin ni haimba handambakmba ni saweri ambu nir, wahau.

<sup>4</sup>Mashi jivi Jisas Kraishin ni sawendari oso mbeek nihik ni hishihi ni sawendari ambu sir. Avui Wasilaka or mbashirik os nimu sawendara. Nir mbeek lerawu oson ni lanak ma nirin li rupshikmba ni landari ambu

<sup>d</sup> 1:6 Ap 17:5-9    <sup>e</sup> 2:2 Ap 16:19-24; 17:1-9

nir. Avui Wasilaka nom lerawu os ni larin or heyehē, or rupshikmbaha ni landari nir. Ortonom wawu os ni hishindan heyenda ri.<sup>f</sup> <sup>5</sup>Jihinjik angop ji heyenda sir. Nir mbeek jirin ni hokovihi, mbele mbelenjik jirin ni jisawendari ambu nir. Erem ni undari oso Avui Wasilaka angop or heyendari sir. <sup>6-7</sup>Uhu nir mbeek jir nga ma anandi lal nga nirin hiushamak ji mbakmbaha ni mbandari ambu nir. Nir aposel Kraishi onik kwambu nga ni nanda nir. Uwa osik jir mbele mbele ji ukwa os ni mbawa mainombo hom unda jir. Hako os jir nga ni liri wolo, erem ni uri ambu nir. Nijava jikisi sihin armek si owe undari hom, jirin erem armek ni undari nir. <sup>8</sup>Nir jirin wapnuku nihik ni owenda osik, Avui Wasilakahi mashi jivin jirin ni sawendari nir. Hako oso nom nembes. Jirin wapnuku nihik ni owenda osik, os ma lal jirin mandingormekmba li uwa, nir jihi farniyik ni sinak li mandingormeshinak ni hakwak nimu hishinduwa. Unak jirin si jelyakmbahan. Mberem ushiwak? Jirin wapnuku nihik ni owenda oja. <sup>9</sup>Jisasin hishindiyananda ma jirin, os jir nga ni liri wolo, lerawu havakavan ni laha mashi Avui Wasilakahin ni sawendari nir. Las avak men ni linak akwa mbele mbele yelndam nirin ji haha sunguwavu jihi kavak si nanda ngashi, karem ni mbaha akwan nihinjik ni frungawuhu ni akmbaha, niri tandi lerawu anandin ni landari angop ji heyendari sir.<sup>g</sup>

<sup>10</sup>Jir nga Avui Wasilaka nga angop ji heyenda sir, mbele mbele os jir Jisasin hishindiyananda ma jirin ni undarin. Nir orhi misokomek jivi mendek ni naha nombo wornan ni tiyandari nir. Nir mbeek mbele las ni urik mbangondari ambu sir. <sup>11</sup>Angop ji heyenda sir, os avoko jikisi orhin or owesawenda hom, jirin erem ni owesawendarin.<sup>h</sup> <sup>12</sup>Nir jirin ni saumukoloshinak sunguwavu jihi si mbornakmbaha ni owesawendari nir. Ushinak avak os Avui Wasilaka ji tiyakmba or mbanda nombon ji tiyakmbaha, sunguwavu mende nihi nga jirin ni owesawendari nir. Or angop jirin kamari ri. Ushinak kuyanga orhik ji ihi ukruharanda orhik ji likmbahan.

### **Jisasin hishindiyananda ma ondo nomorawun kishanda lir**

<sup>13</sup>Mashi Avui Wasilakahin ni sawerik ji misiri mbeek, “Ma misambik fehe sawenda mashi sir,” karem ji mbaha mblarnari ambu jir, wahau. “Mashi Avui Wasilakahi indinga sir,” karem ji mbaha yawur ji misihi ji tiyari sir. Unda mashi oso jir Jisasin hishindiyananda ma sunguwavu jihik si naha osmu jirin jelyanduwa. Uwa osik nir ermba ermbak Avui Wasilakan armesarmek nimu mbanduwa.<sup>i</sup> <sup>14</sup>Jisasin hishindiyananda ma jirin, provins Judiak linda Judama ondon ji hishika. Avui Wasilakahi sios orok fehe Krai Jisasin li hishindiyananda osik Judama anandi ondo lirin kavakavak

<sup>f</sup> 2:4 Ga 1:10   <sup>g</sup> 2:9 Ap 20:34   <sup>h</sup> 2:11-12 Ap 20:31   <sup>i</sup> 2:13 2 Te 2:13

undari lir. Jir nga erem, Kraisi Jisasin ji hishindiya anda osik, jiji ma ol yanga nakrem ji linda ondo mu jirin erem kavak nanduwa.<sup>j</sup> <sup>15</sup>Judama ondo profet ol mas lindari ondon li mandingormeshihi Wasilaka nihi Jisas er nga mandingormeri lira. Uhu nirin li waplelenaha li mbashirik ni halashi iri nir. Uhu Avui Wasilaka os or rupshinda nombon li mblarna ermbehe ma amber wutari lihik li oweri lir.<sup>k</sup> <sup>16</sup>Mberem ushirik? Lir mashi jivin Judama ambu ondon ni sawekunda nombon arangonda lir. Lir mbeek Avui Wasilaka Judama ambu ondon or jivinakmba hishinda ambu lir. Erem li uwa, kavakava lihi oso wasilaka mendek si nawak Avui Wasilaka waplelena orhi osmu lihik nanduwa.

**Pol Tesalonaikak linda man indik or heyekuri mendek or hishiri**

<sup>17</sup>Jisasin hishindiya anda ma jirin, Judama nirin kavak li nakmba li urik jirin nimu halashi tara. Uhunda osik kandakar nga nambek nimu linduwa. Hako wavu nihi mbeek jirin ni hishawa ambu nir. Wavu mende nihi nga indik jirin ni heyekwak nimu hishinduwa. <sup>18</sup>Jirin ni heyekuri mendek ni hishiri nir. Hako an Pol, hindi mushak jirin a heyekmba nombo nombon a lasari nir. Hako Laulaka nombon or arangoshihindak nimu linduwa. <sup>19</sup>Nir kwambu mendek karem nimu hishinduwa. Os Wasilaka nihi Jisas indik or takwa wolo, jir sishinak lerawu jivi os ni landa si mukunak or heyeye hi nihin or hauoweshinak ni rupshikwa nira.<sup>l</sup> <sup>20</sup>Jir sishinak nir warje mende nga ni rupshihi kumbanukuk ni sikwa nir.

**Pol Timotin or mbashirik Tesalonaikak lindan or saunjelyakmba nor iri**

**3** <sup>1</sup>Nir jir mendenjik ni hishihi ni holori nir. Hako mbeek a rakuri nombo si sutlashirik a heyeri kom te.<sup>m</sup> <sup>2</sup>Uri osik Atensik ni lihi an nga Sailas nga shir Timotin shi mbashirik jihik ormu ira. Timoti maha indinga nihi hom nanda ri. Avui Wasilakahi lerawun landa mak or naha mashi jivi Kraishin sawenda ri. Jisasin tiyanda nombon jirin or saunjelyashinak kwambuk ji sitambanakmbaha orin shi mbashirik ormu ira.<sup>n</sup> <sup>3</sup>Las avak nomorawu os ji kishanda oso si unak, jiji lal wavu musha mushak ji hishihi ji tukuyinda ngashi, karem ni hishiri osa. Jihinjik angop ji heyenda sir, nir amber Jisasin hishindiya anda ma nomorawun ni kishakmbaha Avui Wasilaka angop or mbahanda sir.<sup>o</sup> <sup>4</sup>Os jir nga ni liri wolo, karem ni saweri osa, nomorawu avak jir nga nir nga nihik talakwa sir, karem ni saweri nir. Uhunda nomorawu osmu jihik talanduwa. <sup>5</sup>Erem si nari osik mbeek nambek Timotin a toltangriri ambu nir. Las avak Laulaka jirin or mamblaselashinak Jisasin ji hishindiya anda nombon ji

<sup>j</sup> 2:14 Ap 17:5    <sup>k</sup> 2:15 Ap 9:23,29; 13:45,50; 14:2,5,19    <sup>l</sup> 2:19 Fl 2:15-16; 4:1; 2 Te 1:4  
<sup>m</sup> 3:1 Ap 17:15    <sup>n</sup> 3:2 Ap 16:1-3    <sup>o</sup> 3:3 2 Ti 3:12

halashinak lerawu os ni landa mendek si nanda ngashi. Karem a hishihi kolok Timotin a mbashirik jirin or heyekurik ormu ira. Uhu or heyehé indik or raha os ji liwa liwan or sawenak a misikmbahan.

**Timoti os indik or tari wolo Tesalonaikak linda  
ma jip li sirin Polin or sawerik or rupshiri**

<sup>6</sup>Timoti jirin or halaha angop indik tari ri. Uhu mashi os jip ji sindari nombon nirin or saweri karem. Avui Wasilakan ji hishindiyaha man wapnuku jihik owenda jir. Uhu nirin ermbak armesarmek mbanda jir. Uhu jirin ni heyekmbaha ni hishiwa hom, jir nga nirin ji heyekmba jimu hishi mendenduwa. Karem or sawerik nimu misira.<sup>p</sup> <sup>7</sup>Jisasin hishindiyanda ma jirin, os Avui Wasilakan kwambu mendek erem ji hishindiyanda nombon ni misihi sunguwavu nihi osmu mbornanduwa. Uhu Jisasin ni hishindiyanda nombo orok talanda nomorawu oson nimu kishanduwa.<sup>q</sup> <sup>8</sup>Nir angop ni misiwa jir. Jir Wasilakan ji hishindiyaha sitambananda jir. Er ji sitambana nahi, nir nga er ni rupshi mendehe kwambuk ni sitambanakwa nir. <sup>9</sup>Nir jirin ni hishihi Avui Wasilakan ni sawewa wolo jirin nimu warje mende nga rupshinduwa. Uhu Avui Wasilakan armesarmek ni mbanda nombo mberem ni mbakwa ambu re. Oso warje mende nga nawa sir te. <sup>10</sup>Niri tandi jirin ni hishihi Avui Wasilaka or halashinak jirin ni ta heyekmbaha orin ni sawenda nir. Jihik ni taha Avui Wasilakan ji hishindiyanda nombo jihi oso ni saumbornashinak, warje mende nga kwambuk si nakmbahan.

**Pol Avui Wasilakan or saweri**

<sup>11</sup>Avui Wasilakan ni sawenak or nga Jisas Wasilaka nihi nga nirin fri halashinak jihik ni ikmbaha nimu sawenduwa.<sup>r</sup> <sup>12</sup>Uhu Avui Wasilaka jirin or jelyashinak, jir Jisasin hishiowenda ma jihi ambek wavu jihik ji anaowekmbahan. Uhu Jisasin hishindiyanda ambu ondo amber er nga warje nga wavu jihik ji owekmbahan, os nir jirin wapnuku nihik ni owenda hom. Karem Avui Wasilakan nimu sawenduwa. <sup>13</sup>Erem ji undanjik Avui Wasilaka avak jirin or mbornashinak ji sika. Ushinak Jisas Wasilaka nihi nga ma ol orin hishindiyaha hahanda li usaha er nga li rana wolo, jirin or heyewa jivi mendek ji naha, misokome Avui Wasilakahik mbeek mbele kava las nga jihik nakwa ambu sir. Omendinga sira.

**Jir ji nokophirmbiriwa hala**

**4** <sup>1</sup>Jisasin hishindiyanda ma jirin, mashi las a sawekwa karem. Nombo nombo os ji tiyanak Avui Wasilaka jirin or rupshikwa

---

<sup>p</sup> 3:6 Ap 18:5   <sup>q</sup> 3:7 2 Te 1:4   <sup>r</sup> 3:11 2 Te 2:16

angop ni sawerik ji misiri sir. Uhundak os jimul tiyanduwa. Jir angop nir nga nakrem Wasilaka Jisasin ji tiyanda osik, jirin ni saumbornashinak ji sitambanaha, warje mende nga er ji funtlehavantlehe orin ji tiya ika. <sup>2</sup>Mberem ushiwak? Jir Wasilaka nihi Jisas kwambu orhi orok mainkwambuk jirin ni saweshirik angop ji misiri osa.

<sup>3</sup>Os ji nakmba Avui Wasilaka hishiwa karem. Jir avak maome sunguwavu jihin simbalesik jihinjik orin ji haha, orhi mashi nom er ji misindiyaha, misokome orhik jipwornak ji lika. Uhu nokophirmbirihulatulhakanda nombon er ji halaka. <sup>4</sup>Uhu jir avak os ji nokop ukwak ji hishinda wavu oso jihik tasandan er ji halaka. Uhu avak Avui Wasilaka rupshinda nombon warna nom ji tiyaka. Unak hulaima nokopma avak jirin li heyeye li rupshika. <sup>5</sup>Las avak wavu kava si rasanak ji wapkava hishihi nokophirmbirinda nombok ji layinda ngashi, os Avui Wasilakan kumasinda ma li unda hom. <sup>6</sup>Jir avak nakrem Jisasin hishindiya ma lar ji haimba handambaha, nokove orhin ji masnalawa hala. Angop mainkwambuk ni sawerik ji misiri sir. Os erem ji u nahi, Avui Wasilaka avak wasa kavan or hakwa jir. <sup>7</sup>Or mbeek erem unda nombon ni tiyakmbaha nirin or kama nor usharik orhik ni tari ambu nir, wahau. Jip wornak ni liyakmbaha nirin kamari ri. <sup>8</sup>Uwa osik os mashi kason ji mblarna ormben nahi, jir mbeek mashi nihin ji mblarna ormbewa ambu sir, wahau. Jir Avui Wasilaka or Masikome orhin nirin hahanda ma otohi mashin jimul mblarna ormbenduwa. <sup>9</sup>

### Jihi ambek ji anarupshihi lerawun ji laka

<sup>9</sup>An mbeek nakrem Jisasin tiyanda ma ondon ji rupshinda nombon onson mashi lal nga na kayekwa ambu nir. Mberem ushiwak? Avui Wasilaka angop or sawerik ji misiri sir. <sup>10</sup>Uhu jir Jisasin hishindiya ma ol provins Masedoniak linda ondon rupshinda jir. Hako Jisasin hishindiya ma jirin, nir sunguwavu jihin ni saumbornashinak, os erem ji uwan warje mende nga er ji funtlehavantlehe ji uka.

<sup>11</sup>Os mas jirin ni sawerik ji misindari hom, avak yawur ji yarihi, lerawu jihin ermbe ermbeke ji funtlehavantlehe laka. Uhu akwa mbele mbelen jihinjik ji frungawuhu jikisnokopji jihin ji jelyaka. Men ji lihi yaha ma lawa lerawu yejen heilakailambawa hala, wahau. Lerawun jihinjik ji laka. <sup>12</sup>Erem ji u nahi, mbeek mbele las frungukwa ambu jir. Unak Jisasin tiyanda ma ambu ondo jirin li heyeye avak jirin li rupshihi hi jihin hauowekwa lir.

### Jisas indiyok or taha nirin amber lahara tirsakwa ria

<sup>13</sup>Jisasin hishindiya ma jirin, nir ma ol Jisasin hishiowehe hahanda ondo mbele las lihik nakwan armek ji hishikmbaha, nimul sawenduwa.

<sup>4</sup> 4:3 1 Te 5:23; 1 Pi 1:16    <sup>1</sup> 4:4-5 1 Ko 6:13    <sup>2</sup> 4:7 1 Pi 1:15-16    <sup>3</sup> 4:8 Lk 10:16; 2 Ko 1:22  
<sup>4</sup> 4:9 Jn 13:34    <sup>5</sup> 4:11 Ef 4:28

Las avak ji tlaholo mendenda ngashi, os ma ol Avui Wasilakan hishiowenda ambu ondo lihi ma li hawak li tlaholonda hom. Lir ma ol hahanda ondo indiyok li usahakwa ambu, karem li hishihi tlaholonda lir. <sup>14</sup>Hako nir Jisas or haha indiyok usahari ri, karem ni hishiowenda nir. Uhunda osik ma ol Jisasin hishiowehe hahanda ondo erema. Avui Wasilaka or mbanak lir er nga li usaha Jisas nga nakrem indik takwa lir.<sup>y</sup> <sup>15</sup>Mashi Wasilakahi os nimu jirin karem sawenduwa. Os Jisas indiyok or tawa wolo, nir liwa ma nir mbeek masmas ni ihi, orin maifuk ni heyekwa ambu nir, wahau.<sup>z</sup> <sup>16</sup>Wasilaka avak lakak or mbanak, ensel or maifuk sinda oto or mbanak, fiwa Avui Wasilakahin li ufunanak, oro wolok Wasilaka orhinjik hevenin or halaha takakwa ri. Unak ma ol Kraisin hishiowehe hahanda ondo masmas usahakwa lir. <sup>17</sup>Unak nir liwa ma nir er nga lewas lersuwuk ni lawuhu avak orok orin ni heyekwa nir. Uhu or nga ermba ermbak orok ni likwa nir. <sup>18</sup>Uwa osik mashi kaso avak jiji ambek ji anasaumbornaha ji lika.

#### Ji auheye ji linak Wasilaka or taka

**5** <sup>1-2</sup>Jisasin hishindiyanda ma jirin, Wasilaka os or takwa wolo, hirnyanda ma hom tumsar or takwan jihinjik angop ji heyeyarinda sir. Unda osik nir mbeek mashi las nga os or takwa wolon ni kayeshinak ji heyekwa ambu sir.<sup>a</sup> <sup>3</sup>Hulaima nokopma avak karem li mba, “Mbele kava las talakwa ambu sir. Jipjip nimu linduwa.” Karem li mbana wolok, mbele mbele lirin kavak nakwa lirik talakwa sir. Os nokove jikisin si wakwak tumsar entlembalen si misinda hom, lirik talakwa sir. Ma lar mbeek oson wasisondahi ambu ri.<sup>b</sup>

<sup>4</sup>Hako Jisasin hishindiyanda ma jirin, jir mbeek nirtle nirndum nanda mishik linda ambu jir. Uwa osik Jisas tumsar or takwa wolo mbeek lishnyafakwa ambu jir, os hirnyanda ma tawak ji heyeye ji lishnyafanda hom, wahau. <sup>5</sup>Jir amber ta ji harawak linda ma jira. Nir mbeek nirtle nirndum nanda mishik ni linda ambu nir.<sup>c</sup> <sup>6</sup>Uwa osik nir avak yawur ni auheyehe, ni ruwol tava oloho ni lika. Las avak os ma lal li unda hom ni suknya hishanda ngashi. <sup>7</sup>Angop ni heyenda ola. Suknyanda ma ondo niri wolok suknyanda lir. Uku kavan anda ma ondo nirikop uk aha ambarambasinda lir. <sup>8</sup>Hako nir ukruharandak ni linda nir. Unda osik ni ruwol tava oloho Avui Wasilakan ni hishiowehe, ma anandin er nga ni rupshika. Erem ni u nahi, mbeek mbele kava las nihik nakwa ambu sir. Uhu os Wasilaka indiyok nirin or lakwa oson ni nikishihi jip ni lika. Uhu ni auheyehe kwambuk ni sika.<sup>d</sup> <sup>9</sup>Avui Wasilaka mbeek waplelena orhi oso nihik si nakmbaha nor kamahanda ambu nir, wahau. Or Wasilaka

<sup>y</sup> 4:14 Ro 14:9; 1 Ko 15:3-4,12    <sup>z</sup> 4:15-16 1 Ko 15:51-52    <sup>a</sup> 5:1-2 Mt 24:42-43; 2 Pi 3:10; Rev 3:3    <sup>b</sup> 5:3 Mt 24:39; Lk 21:34-35    <sup>c</sup> 5:5 Ro 13:12    <sup>d</sup> 5:8 Ais 59:17; Ef 6:14,17

nihni Jisas Kraisa kavakava nihini or yoko ermbehe, nirin indiyok or lakmbaha nor kamari nir. <sup>10</sup>Jisas nirnjik hari ri. Uhunda osik os ni liwa mo ni hawa, avak or nga ermba ermbak ni likwa nir. <sup>e</sup> <sup>11</sup>Uwa osik jir amber jihni ambek jini anasaumbornaha, jini ananjelyaha jini lika, os ermba ermbak jini unda hom.

**Avui Wasilaka orhi man or jelyashinak avak jivijivi nom li uka**

<sup>12</sup>Jisasin hishindiyananda ma jirin, nir jirin ni sawekwa karem. Jir avak sios lida jihni ol jirin jelyanda lihi siyok jini sika. Mberem ushiwak? Wasilaka lirin or kamashihindak olmu sinduwa. Uhu kavakava jihni os jini undan li heyehe jirin li tolo wornashinak wornak jini sikmbahan. <sup>13</sup>Lerawu os li landan jini hishihi jini mba, “Lerawu jivin landa lir,” karem mbaha lirin warje nga jini rupshihini hi lihini jini hauoweka. Uhu jihni ambek jini anafalika. <sup>14</sup>Jisasin hishindiyananda ma jirin, jirin nimu sawenduwa. Homborombonda ma ondon jini ngria saweshinak lerawun kwambuk li laka. Uhu ajelijisinda ma ondon jini saumbornashinak kwambuk li sika. Uhu ma ol kwambuk sinda ambu ondon naman jini saunjelyashinak, kwambuk li sika. Uhu ma amber mainalok jini saweka. <sup>f</sup> <sup>15</sup>Hako os ma jirin kavak li uwa, jir nga lirin wasan kavak jini uwa hala. Ermba ermbak jihni ambek jivijivikop jini uhu, ma anandi er nga armek jini uka. <sup>g</sup> <sup>16</sup>Ermba ermbak jini rupshika. <sup>h</sup> <sup>17</sup>Uhu ermba ermbak Avui Wasilakan jini saweka. <sup>18</sup>Mbele mbele jivi nga kava nga amber ol jihik talawa, Avui Wasilakan armesarmek jini mbaka. Or erem jini ukmbaha hishinda ora. Mberem ushiwak? Jir angop Kraisa Jisashi mak nahanda oja. <sup>i</sup> <sup>19</sup>Os Masikome Avui Wasilakahi os mbele las jini ukmbaha nor sauhawa, avak jihinjik jini pantlewa hala. Os or mbawa hom jini uka. <sup>j</sup> <sup>20</sup>Uhu Masikome Avui Wasilakahi or sauhawak jirin profet mashik sawewa ma lihi mashin jini misika. Lirin jini wapkava hishihi jini kumasiwa hala. <sup>21</sup>Hako mashi os li sawewan armek jini eweheyehi, mainome nom jini misi jini tiyaka. <sup>k</sup> <sup>22</sup>Uhu mbele mbele kava amber jini halaha jini atamataweyaka.

<sup>23</sup>Avui Wasilaka ortonom waphimbijin nirin or handa osik, orin nimu sawenduwa. Ushinak jirin or jelyashinak jivi mendek jini likmbahan. Os jini hishinda nombo jihni nga, jini ukmba hishinda nga, mbele mbele jini unda nga, worna mendek si nanak, Wasilaka Jisas Kraisa indik or tawa wolo, mbeek mbele kava las nga nakwa ambu jir, wahau. <sup>l</sup> <sup>24</sup>Avui Wasilaka or jirin kamahanda oto os or ukmbaha nor mbahanda hom, omendingak or ukwa sir. Or mbeek mashi las or mbahandan or hishakwa ambu sir. Os or mbahanda hom or ukwa sir. <sup>25</sup>Jisasin hishindiyananda ma jirin, jir avak Avui Wasilakan jini sawenak nirin or jelyaka. <sup>m</sup> <sup>26</sup>Jir avak hulaima

<sup>e</sup> 5:10 Ro 14:8-9; 1 Te 4:14 <sup>f</sup> 5:14 2 Te 3:6,11 <sup>g</sup> 5:15 Ro 12:17; 1 Pi 3:9 <sup>h</sup> 5:16 Fl 4:4  
<sup>i</sup> 5:18 Ef 5:20 <sup>j</sup> 5:19 Ef 4:30 <sup>k</sup> 5:21-22 1 Jn 4:1 <sup>l</sup> 5:23 2 Te 3:3 <sup>m</sup> 5:25 Kl 4:3; 2 Te 3:1



nokopma Avui Wasilakahin armesarmek ji makaptakhavan tleka. <sup>27</sup>An Wasilaka nihi Jisas Kraisi kwambu orhi orok mainkwambuk jirin amu sawenduwa, jir jekamba kason ji ritim unak, Avui Wasilakahi ma amber li misika. <sup>28</sup>Jirnjik Avui Wasilakan a sawenak waprushi Wasilaka nihi Jisas Kraishi jir nga si naka. Unda kasira. Ambehoma.